

MAI TE ATUA ATOÀ RA TE HURU

Ua parau mai ra taua ôfi ra i te vahine : E òre òrua e pohe, ua ite hoi te Atua e, ua âmu anaè òrua i to reira, e âraâra ia to òrua mata, e e riro òrua mai te Atua ra te huru i te ite i te maitai e te ino.

Ahiri tâtou e aniraa-hia na e horoà i te tahi iôa no tele tuhaa parau, eita e òre tâtou i te mairi i to na iôa: Te faahemaraahia te vahine. Aita tâtou i hape i te reira vâhi. Mea tano atoà rā tâtou ia ite e, te auraa mau o te faahema, o te huru peu ia ta te hoè taata e rave ia faahinaaro o ia i te hoè vahine, aore ra te peu ta te hoè vahine e rave ia faahinaaro o ia i te hoè tâne. E te hemaraa, o te taime ia tele taata fârii ai, oia hoi te taime o ia ite ai e, te vai ra te maitai no na i roto i taua mea i tuuhia mai i mua ia na ra. I roto i te faahema, te vai ra te hinaaro i te tahi pae, e te hinaaro òre i te tahi pae. Ta te faahema ôhipa e rave, te imiraa ia i te rāveà ia tae atoà te tahi i roto i te hinaaro.

I roto i ta tâtou parau, aita te ôfi e imi nei i te rāveà ia faahinaaro mai te vahine ia na, aore ra ia tiāturi mai ia na. Ta na noa e imi nei, ia faāatea mai ia te vahine i te Atua e ia òre ia haapaò atu i to na hinaaro mau.

Tāmata tâtou i te hiò mai i te mau rāveà ta te ôfi i faaôhipa a ite atu ai te vahine i to na maitai i roto i te parau i parauhia mai ia na.

E ORE ORUA E POHE

E piti taata ta te Atua i hāmani, hoè anaè ta te ôfi e tāmata nei. Ua faaairo rā o na i tele hoè ei faaoti atoà i te parau o te tātōa. Te nā ò nei o ia : E òre òrua e pohe, aita rā i nā ò e : E òre òe e pohe. Te ite ra tâtou i te hopolā rahi a te hoè taata ia tuuhia i roto ia na te manaò e, e tiāmāraa to na ia parau nā niā i te iôa o te tātōa. E hopolā no te taata i âraâra te mata, e taoà faahinaaro rā e te nounou rahi no te taata manaò potopoto. I te ômuaraa ihoā, te tuuhia mai nei te mana i mua i te taata, te mana no te faaoti e, terā te mea e ora ai te tātōa, e terā te mea e



pohe ai . t

Eere ānei e, mea au ihoā na te taata ia faaturaturahia o na, ia faateiteihia, hau roa atu mai te peu e, i roto i taua tura no na ra e oti ai te parau o te tahi pae i te faaotihia.

Aita te ôfi e parau nei e, ua haavare te Atua, aita atoà rā o ia e parau ra e, e ora tele nā taata i te faaotiraa ta te vahine e rave atu. Mea tano tâtou ia ara maitai i te auraa o te parau e te mea i parauhia. Te parauraa e : E òre òrua e pohe, eere ia hoè ā auraa e : E ora òrua. Tele te paari o te ôfi : te vai iho ra o na i te vahine ia pāhono na i te mau mea ta na i òre i parau. Aita te ôfi i parau e : E ora òrua, na te vahine noa te reira i manaò.

Te rahiraa o te mau fifi ta tātou e fārerai nei, eere ia no te mea i parauhia, no te auraa rā, te tatararaa ta te reira e te reira taata i manaò e, o te auraa mau ia o te mea i parauhia, oia hoi te manaò ta te taata i hāmani i niā i taua parau ra. Hau roa atu ai te fifi i te rahiraa, mai ta tele parau e haapii mai nei ia tātou, ia manaò te taata hoè e, to na manaò ra, o te manaò atoà ia o te tātōa. Oia hoi, ia faaoti o na i te parau o te tātōa i roto noa i ta na i faaoti, mai te anī òre atu i to rātou manaò.

Te taata pohe ta

tâtou i ite, e taata ia tei piri te mata, tē òre e ite faahou, e taata atoà hoi tei faaea to na parau. Te haapāpū nei rā te ôfi i te vahine e, eita rāua e pohe, oia hoi eita rāua e riro mai tele te huru ta tātou i hiò aè nei. No tea mea rā aita te vahine i ite i te auraa o te pohe, inaha no roto mai hoi rāua i te ora, no reira to na manaò i huru ôhi ai i te āna-natae i mua i te parau a te ôfi.

No te mea o na te faahema, eita ia te ôfi e haamāramarama i te vahine i tele parau no te pohe. Te auraa ra, rahi noa atu ā te vahine i te pōiriraa, rahi noa atoà atu ā to te ôfi pūairaa. Na to na pōiri i faaturori i te vahine. Ia hiò maitai anaè rā tātou, aita te ôfi e haapōiri nei i te vahine, te faaapiapi noa nei o na i te māmaramama, te hopeāraa rā, e māmaramama òre ihoā ia.

E ÂRAÂRA TO ORUA MATA

Hou te ôfi a faaite ai i te maitai e roaa mai i te òreraa e haapaò i te faaue a te Atua, te faaturori nei o ia i te āau o te vahine : Ua ite hoi te Atua e ... ia faaôhipahia tele taò : hoi, i roto i te tahi irava, no te haamanaò ia i te tahi mea itehia. Te auraa ra, e parau itehia tele ta te ôfi e hinaaro nei e haamanaò noa atu i te vahine. E mai te peu e parau itehia ra, e aha

paia ia te Atua i òre i faaite atoà mai ai ia rāua. Te auraa ra, te hunahuna nei te Atua i te parau, aore ra, e āfaraa parau mau noa ta na e horoà nei ia rāua. E mai te peu e āfa parau mau, te hinaaro nei ia te ôfi i tele taime e horoà i te tahi āfaraa, ia hope roa te ite o te taata i te parau mau.

Ua parau na te Atua e, e pohe ta te faaroo òre e faatupu mai, oia hoi e pō te mata, eita e ite faahou, e e faaea hoi te parau o te taata. Areā te ôfi, te nā ò nei ia e : E âraâra to òrua mata.

Ia hiòhia te auraa o te pohe ta tātou i hiò i niā nei, eita e òre tātou i te nā ò e : E âraâra to òrua mata, tele ia te auraa : eita to òrua mata e pō, eita òrua e faaea i te ite, eita hoi e faaea i te itehia mai, eita atoà hoi te taata e faaea i te faahiti i to òrua parau.

Mea tano rā tātou ia ara noa i tele vâhi : aita te ôfi e horoà nei i te auraa o te mea ta na e parau ra, te vai iho faahou ra o ia e na te vahine e tuu i te auraa tei au aè i to na manaò i roto i te parau ta na i faahiti noa atu.. Eere ānei e, e âraâra atoà te mata o te pohe, no te mea te mata âraâra, eere ia i te tēpaò noa no ta ara, aore ra no te ora, tei roto atoà te reira huru i te mehameha e te riāriā. I niā rā i ta te ôfi huru parauraa, eita e òre tātou i te māmarama-

rama i te huru auraa ta te vahine i hinaaro i te horoà i taua parau ra.

E RIRO ORUA MAI TE ATUA.

A tae hoi e, mai te peu te òreraa e haapaò i te faaue a te Atua e horoà mai i te āfāitoraa te taata i te Atua, e aha ia te mea e tēpeā faahou i te rima o te vahine i te raveraa mai i te mea i ôpanihia.

Tele mana to te Atua, mai te pō mai ā o tele nei ao to te taata faahinaaro-noa-raa e to na imi-noa-raa i te rāveà ia roaa mai ia na.

Te riro (e riro òrua mai te Atua), e parau ia no te tahi tauiraa, oia hoi te tahi faarueraa i te tahi huru tahito no te tomo i roto i te tahi huru āpī. Tele te māinu, aore ra te āpa faahiahia roa aè ta te ôfi i faaineine mai : mai te Atua, oia hoi, te atua-atoà-raa te taata. Te mau mea atoà i itehia e i faataahia no te Atua, oia hoi : te haamoriraa, te faaturaraa, te faahanahanaraa, te hinaaro nei te taata ia nā reira-atoà-hia mai no na.

Te huru parau tele i haamoè roa i te hiroā o te vahine. Te mea noa ta na e ite ra i tele nei, tele ia hinaaro i te ò-atoà-raa i roto ia na : mai te Atua ra te huru. Aita o na e ite faahou ra e, te anī mai ra te ôfi ia na e òrere i te hau o te Atua, e haafauā òre i

to na mana, ta na mau faaueraa e to na hinaaro i te taata. No te navenave o te parau, e au ra e, ua atua e na te taata, moèhia atu ra ia na te repo no reira o ia i te ipōpōraahia mai, moèhia atu ra ia na te aho e faaora ra ia na, moèhia atu ra ia na e, hoè anaè Atua. Ua atua atoà anaè te taata ra, eere ia te Atua i te atua faahou. Ua hanahana anaè te taata ra, tē mohimohi atu ra ia te Atua.

EIAHA E FĀITO I TE ATUA.

Aita te Atua i tuu mai i te fāito ta te taata e aè e tae atu ai o ia i te èā hopeā, oia te tucaraa e te āfāitoraa i te Atua. Te haapiiraa ta tele parau e haapii mai nei ia tātou, tele ia : Eita tātou e riro ... Ua tauī te Metia i te pape ei uaina, na vai rā tātou e tauī atoà a riro mai ai mai te Atua ra te huru. Eiaha tātou ia hape, aita te Atua e hinaaro nei i te tahi atua i mua ia na, te hinaaro noa nei o na i te taata ta na i hāmani ia ite e, e mea hāmanihia o na, e ia ite hoi e, te anī mai ra to na Fatu ia na e haapaò i ta na mau faueraa, tirā rā.

Haamanaò atoà rā tātou e, eere o Eva anaè tei faahinaaro i te pārahiraa o te Atua. Mea pinepine roa atoà te Atua i te ère i to na pārahiraa i tele mahana.

TURO A RAAPOTO